

Gyaez Ndaw Maenz

红薯里的爱

“Dinglingling——” Raq sing lingz dienhvah coeg rwz ndeu cauz ndiu loq ndaw gyanghaet gou. Gou nunu lwgda, henz rwz cienz daeuj sing sug daxgoeng: “Lan ha, bineix maenz ndaw ranz ndaem haenx ndaej sou lo, mwngz ceiq gyaez gwn lo……” Daxgoeng youq dienhvah mbiengjde gangj mbouj dingz. “Mbouj law, cozyez gou caengz sij sat, caj singhgiz laj ba.” Gou sing hung naeuz. Gvaq geij ngoenz le, sing lingz haenx youh youq henz rwz gou yiengj hwnj. Lij caengz caj gou hai bak, daxgoeng couh caeuj gou ienq naeuz: “Ai, lan ha, mwngz itcig mbouj ma, gou louz di maenz hung caengz sou, siengj louz hawj mwngz gwn, mbouj liuh daengz deng vunz caeg bae lo.” Vah daxgoeng gig hojsik caeuj fouznaih, gou cix mbouj naihfanz lo: “Goeng ha, mwngz baezlaeng gaej vih cungj saeh neix dwk dienhvah daeuj lo, gou cingq nyaengq sij cozyez ne!” Sing ienq daxgoeng fwt dingz lo. Haujlai nanz, de cij gangj: “Ndei ba.”

Seizgan gvaq bae haujlai nanz. Miz ngoenz ndeu cuengqhag ma ranz, gou sou daengz daxgoeng

geiq daeuj daeh maenz caeuj fung saenq ndeu. Hai aen daeh, heiq namh singjsien coemj haeuj ndaeng daeuj, cungj feih neix haemq nanz mbouj mup daengz lo, gingqyienz miz cungj roxnyinh caenciet haujlai nanz mbouj gamjsouh daengz haenx. Caiq yawj daeh maenz, moix aen hung iq ca mbouj lai doxdoengz, vanzlij uet ndaej seuqsag dem. Gou caj mbouj gib hai fung saenq yawj, ndaw saenq daxgoeng sij naeuz: “Lan ha, mwngz haujlai nanz mbouj ma lo, maenz dengz cumx did ngaz lo, gou genj gij ceiq ndei hawj mwngz, aenvih goeng rox mwngz ceiq gyaez gwnz maenz. Lan gvai, gou rox mwngz hagsib nyaengq, hoeng miz seizgan ma yawjyawj, goeng siengj mwngz lai lo……” Saenq doeg daengz neix, ndaeng gou manh lo. Gou lumj yawjraen daxgoeng aeu song fwngz cozcet de uet aen maenz, gwnz naj ndaemndwt miz gij vuenyungz caeuj rimhoz riu dwk, de sijsaeq uet moix di namh gwnz maenz, moix di uq gwnz maenz. Seizde ndaw da gou cungj dwg raemxda, ndaw mumjgyumq, feihhom lwgmaenz buenx dwk gij feih gyaez iemq haeuj ndawsim gou.



“Boh, ngoenzsinghgiz raeuz bae yawj daxgoeng ba!” Daxboh riu dwk ngaekngaek gyaeuj, de lumj rox gij sim’eiq gou nei.

Gij gyaez ndaw maenz daxgoeng, yuk ndiu gij caencingz ninzndaek haemq nanz gou. Ndaw gwndaenj, raeuz mboujduenh bae ra vuenyungz, gizsaed vuenyungz couh youq henz ndang raeuz.

(Gyanghsuh Swngj Suhcouh Si Mozcwngz Cunghsinh Siujyoz roek nienzgaep Liuz Mungyingz)



Gvej Haeux

割 稻

Bi’ gvaq mwh muengzcungq, gou youq ndaw naz ndaem haeux, yaepyet couh daengz seizcou lo, geiqciet ndaeksou daengz lo. Seizcou ngoenz ndeu, gou caeuj daxboh daxmeh caez daeuj ndaw naz gvej haeux.

Gou angqvauvau buet bae coh doenghnaz, yawj baihnaj, dwg benq haij henjgim ndeu. Rumz ci gvaqdaeuj, langhhaeux fubfab, rienghaeux henjrwgrwg riu ndaej ndang gungj lo, henz rwz cienz daeuj sing yiengjsasa, lumjdwg danz diuz go demsou nei.

Gou gyaeuj daenj mauhdemx, fwngz gaem fagliemz, deq mbouj gib roengz naz bae. Gou gungj ndang roengzdaeuj, fwngz swix gaem cungqgyang gohaeux, fagliemz fwngz gvaz dep goek haeux, yungh rengz gvej coh baihlaeng, gaem haeux ndeu couh gvej roengzdaeuj lo……

Mbouj yaep ndeu, buh gou deng hanh iemq dumz lo, hoeng yawj henz din doi hwnj baenz bog baenz bog haeux, gou ndawsim cungj dwg angqvauvau. Baenz naed baenz naed haeux fagfwdfwd, lumj baenz naed baenz naed gim henjrwgrwg nei, youq laj daengngoengz ciuq, yienhndaej daegbied lwenqda.

“Gvak rum daengz banringz, ndik hanh ringx roengz namh. Byawz rox ngaiz ndaw vanj, naednaed hanh giet baenz.” Gou caencingq roxriuj haeuxgwn ndaej daeuj mbouj yungzheih lo.

(Gyanghsuh Suhcouh Si Fanghcouh Siujyoz neigih nienzgaep Hangz Yigaij)

Saeh Byawz Byawz Guh

自己的事情自己做

Gou bineix gaenq hwnj sam nienzgaep lo. Youq ndaw hagdanz, moix yiengh goenggoq gou cungj gig ndei, youq ndaw ranz gou hix siengj yienghyienh saeh cungj swheij gag guh.

Gyanghaet, gou ngamq hwnqdaeuj, daxmeh couh gvaqdaeuj bang gou daenj buhvaq. Gou ganjgip bibi fwngz, naeuz: “Meh, saehcingz gou gou gag guh, mwngz mbouj yungh caiq bang gou daenj buhvaq lo!” Daxmeh naeuz: “Mwngz seizneix cujyau yinvu couh dwg hagsib, doenghgij saeh neix mwngz mbouj yungh guh!” Gou naeuz: “Meh, roeglgw ndaej aeu hag rox gag mbin, danghnaeuz daxmeh cungj itcig henhoh de ne, de couh ciengxlwenx mbouj rox mbin! Gvaqlaeng gou gag daenj buhvaq, daenj haiz, roi gyaeuj, swiq naj ba!” Daxmeh angq dwk naeuz: “Lwg gou cungjsuenq majhung lo!” Dingqnyi daxmeh gangj gij vah neix, sim gou lumj ndaej gwn dangz nei diemzsubsub.

Banhaemh, gou sij sat cozyez le, gag naemj: Daxboh ngoengznaengz guhhong baenzneix naet, mbatlaeng cozyez gou couh gag genjcaz ba, gaej hawj daxboh sinhoj lo. Gou dawz cozyez nyinhcaen genjcaz hwnjdaeuj, dawz giz loek baez giz baez giz gaijcingq. Daxboh naiqnuknuk ma daengz ranz le, ciuq-yienh dawz cozyez daeuj genjcaz, caen hawj gou gamjdoengh ha! Gou ganjgip buet gvaq-bae, bibi fwngz naeuz: “Boh, cozyez ngoenzneix

gou gag genjcaz lo, baezlaeng saehcingz gou hawj gou gag guh ba, mwngz ngoenznaengz cungj baenzneix sinhoj, wnggai ndeindei yietnaiq.” Daxboh yawjyawj gou, ndawsim diemzsi riu naeuz: “Lwg gou cungjsuenq majhung lo, rox gvansim ciuqgoq bouxlaux lo!”

Yaek ninz lo, yahdaiq youj bat raemxndat he byaij coh gou naeuz: “Daeuj, yahdaiq bang mwngz swiq din lo!” Gou ganjgip buet gvaqbae, cieq gvaq bat raemx ndaw fwngz yahdaiq, naeuz: “Daiq, baezlaeng saehcingz gou gou gag guh, mbouj yungh mwngz bang gou lo! Baezlaeng gou daeuj bang mwngz swiq din ba!” Yahdaiq dingq gou gangj le, lwgda riu ndaej laep baenz diuz sej ndeu. De lumh aen gyaeuj gou naeuz: “Caen dwg lwg gvaigvet ha!”

Menhmenh dwk, gou hag rox le saehcingz swheij swheij gag guh.

(sam nienzgaep Vuz Mingz)

